

Minister Alex Schwengle:

Dia 16 di mei 2016 ta un dia historico pa cuida medico na Aruba

ORANJESTAD- Dialuna, dia 16 di mei, 2016 ta un dia historico pa cuida medico na Aruba, segun Minister Alex Schwengle a expresa durante di un conferencia di prensa na Instituto Medico San Nicolas (IM-San). E mandatario a bisa cu despues di hopi analisis y negociacion, AZV, gobierno y IMSan a yega na e punto cu por anuncia na comunidad di Aruba cu a yega na un consenso pa cu a desaroio di servicionan na IMSan.



Minister Schwengle a declara cu e ta contento cu a yega na decisionnan importante cu ta enfoca riba mehora y expande servicionan den cuida medico na Aruba, particularmente hisando e cantidad y calidad di servicionan y cuida cu ta wordo ofreci na San Nicolas, y ta complementa e servicionan y cuida cu ta wordo brinda na Dr. Horacio E. Oduber Hospital.

Hopi miyones a wordo inverti caba na IMSan y no tin ningun logica pa no sigui cu loke a cuminsa caba, haciendo cambio, adaptacionnan y agregando na e servicionan y ekiponan cu ya tin aki, e minister a expresa.

El a agrega cu ta tene na cuenta sigur tambe cu expansion di servicionan e conveniencia y comodidad di e habitantenan di pa ariba di brug, kende lo corta tempo di biahe y espera uzando servicionan cu lo ta disponibel na San Nicolas tambe.

Pa 2018 IMSan, hunto cu su partner internacional Baptist Health South Florida mester ta cla pa ricibi su prome pashent pa radioterapia, cual ta wordo administra cu un linear accelerator hopi moderno, y lo por cuminsa uza e tres salanan di operacion. E salanan di operacion lo ta dedica na cuida diario, o sea

intervencionnan pa cual e pashent no ta wordo admiti den hospital. Si acaso pasa cu un pashent mester wordo admiti, e ta wordo manda hospital.

Como cu IMSan lo sigui desaroia e departamento di especialista di wowo, un di e salanan di operacion ta bira practicamente exclusivamente pa operacionnan di wowo.

Adicional di e 18 stoelnan cu ya ta den uzo completo pa haemodialyse, ta agregando servicionan di peritoneale dialyse; y e departamento di prome auxilio lo conoce expansion y profesionalisacion. Pa cumpli cu rekisitonan pa e

servicio di radioterapia, lo expande tambe e departamento di "rontgen". Lo agrega por lo menos un servicio mas, esta di CT-scan.

E parti di sterilisacion cu ta pertenece na e salanan di operacion ta casi cla, Minister Schwengle a agrega.

E titular di salud a subraya cu lo nifica destruccion di inversion si no sigui cu e plannan pa IMSan. E departamento cu mas ta bay costa na gasto di explotacion ta e salanan di operacion; lo tuma un inversion di entre shete pa nueve miyon florin pa tur cos keda cla.

Realidad ta cu Aruba mester di mas sala di operacion, y esunnan di IMSan lo complementa esunnan di hospital y asina lo corta tambe e tempo cu pashentnan mester warda pa haya un operacion of intervencion. E comunicacion entre IMSan y Hospital tabata hopi importante pa por realiza un bon plan y bon relacion di partner.

Tin un necesidad pa un centro medico na San Nicolas y cu e acuerdo cu a yega entre e partidonan involvi awo por sigui traha riba su realizacion. A inverti hopi caba aki, banda di infraestructura tambe den aparatonan cu ainda no ta den uzo, y lo ta pica pa no caba e trabao.

A pesar cu tabatin algun fout den e infraestructura, manera e escogencia di lift, cual ta mucho chikito pa transporta brancard, y e falta di cumplimiento cu siguridad di candel, pa falta di bon planificacion, lo haci e cambionan necesario y lo sigui cu e plannan nobo y adapta pa ofrece mas servicio y calidad halto di cuida cu lo bay conta cu acreditacion internacional di JCI, Minister Schwengle a remarca. □